



**JUDICIAL SYSTEM MONITORING PROGRAMME  
PROGRAMA MONITORIZASAUN SISTEMA JUDISIAL**

***Komunikadu Imprensa***

*25 April 2013*

**Tribunál kondena pena prizaun tinan 14 fulan 6 ba arguidu krime tentativa omisídiu agravadu hasoru nia kónjuje**

Iha 23 Abril 2013 Tribunál Distritál Dili kondena arguidu ne'ebé halo kime tentativa omisídiu agravadu hasoru ninia kónjuje ho pena prizaun tinan 14 fulan 6. Kondensaun ne'e kiik liu husi alegasaun Ministeriu Públiku ne'ebé husu ba tribunal atu kondena arguidu ho pena prizaun tinan 17 ne'ebé halao iha 10 Abril 2013.

Kazu ne'e partensia ba jurisdisaun Tribunál Distritál Oecusse, maibé leitura akordaun hala'o iha Tribunál Distritál Dili, tanba arguidu serve hela prizaun preventiva iha Becora-Dili.

Ministériu Públiku akuza katak iha 5 Setembru 2012, arguidu lori katana no taa nia feen iha liman sorin. Tanba lezada tahan katana, arguidu kontinua taa tan lezada nia liman sorin, hodi rezulta lezada lakon nia liman rua. Arguidu mós kontinua taa lezada nia hasan sorin no rezulta nehan sorin parte lo'os monu. Arguidu komete krime ne'e tanba deskonfia lezada iha relasaun ho mane seluk.

Ministériu Públiku akuza arguidu kontra artigu 139 Kódigu Penál kona-ba omisídiu agravadu konjuga ho Lei Kontra Violénsia Doméstika. Krime ne'e iha sentensa másimu tinan 25 iha prizaun.

*“JSMP hanoin katak krime ne'e grave teb-tebes tanba kauza vítima lakon nia liman rua permanente, tanba ne'e kondensaun ne'e la reflata gravidade husi aktu krime ne'ebé kondnadu komete, dehan Diretór Ezekutivu JSMP, Luis de Oliveira Sampaio.*

Juis Dr. Julio Gantes prezide leitura sentensa, Dr. Mateus Nesi reprezenta Ministériu Públiku no arguidu hetan defeza husi Dr. Sebastião Amandio de Almeida husi Eskritóriu Defensória Públiku. Zina Maria Soares mak Ofisiál Justisa iha prosesu me'e.

Atu hetan informasaun kle'an favor kontaktu direitamente:

Luis de Oliveira Sampaio

Diretór Ezekutivu JSMP

Diresaun e-mail: [luis@jsmp.minihub.org](mailto:luis@jsmp.minihub.org)

Landline: 3323883 / 77810637

[www.jsmp.tl](http://www.jsmp.tl)